



該條河壩

該條河壩，係佢童年搞水、洗身仔个地方。還記得佢六歲該年，同阿細叔共下去到該條河壩个伯公潭。當會泅水仔个阿細叔，肩頭項擎等脫光光、打裡腩个佢，向潭中央泅過去。緊泅緊深，佢一著驚，就摻吾細叔个頭那沉(cim)到水竇肚，會沒水仔个佢，無唉無哉，跔等佢沉到水面下个佢，鼻公、嘴空一半下嘎搨(giug)入當多水，黏邊兩腳緊蹬、手緊攥、嘴緊喊「無愛，無愛咁啦……」，吾細叔毋知係挑事个，抑係詐耳聾，還係直直泅等過去，吾个雙手搭等吾叔个頭頸緬緬，吾个腳摻吾叔个圓身夾到核核，佢緊泅、佢緊呻……，這就係佢對該跳條河壩，盡深个第一印象。

該條河壩，也係佢讀國中時節釣毛蟹、捉魚仔个所在。落雨過、出汶水个時節，擎枝釣枰、一捲釣線、兩隻挽仔、一确蠔公，就做得釣著歸錫桶个毛蟹。還記得該央時，釣枰一拂，釣餌沉落底，無兩下半釣枰尾就墜下去，魚仔來食釣哩！釣枰彎彎掉啊起來，兩隻兩隻个毛蟹就入落錫桶裡肚。該時節，毋單止毛蟹，河壩肚一哪仔就係魚仔：白哥仔、紅哥白、石斑仔、齊口、山鱧仔、洋公、黃阿角、蝦公、沙溜羌、石貼仔、狗牯琢、團魚、鱸鰻……，河壩肚該有个魚仔，該條河壩就有。這下恤起來，該條河壩裡肚有恁多樣魚仔，實在釣就釣毋忒喔！

該條河壩臂个大石頭頂高，在冬下頭个時節，係莊項人晒鹹菜、蘿蔔仔个地方。一頭一頭滷到淖黃个水鹹菜，晒做半燥溼个覆菜，就做得入甕裝盅，係拿來煮豬肉、豬肚湯，保證食咁會尋尾；一頭一頭滷到淖黃个水鹹菜，晒做燥絲絲个鹹菜乾，拿來煲燻肉，仰般个香氣，鼻著个人定著喊肚飢呢！該切到一砵一砵雪白个蘿蔔仔，晒做泥黃色个蘿蔔乾，香甘个味緒，鼻著个人定著會流口涎水哦；該刷到一條一條金亮个蘿蔔仔，晒做泥黃色个蘿蔔絲，拿來煎卵，特別合味哦；該刷到一坭一坭圓白个蘿蔔仔，晒做捲燥个蘿蔔錢，放入排骨共下煮湯，好食到毋好摻人講哦！

該條河壩，有淖淖个香味，陪佢行過肚飢飢个童年；該條河壩，有豐富个魚群，陪佢行過孤孤單單个童年；該條河壩，有鮮鮮个河水，陪佢行過快樂个童年。該條河壩，厥个名仔安到中港溪。

作者：邱一帆

☆詞彙學習☆

【打裡腩】da` qin zoi`：男生光著下體。

【石斑仔】sag ban` e`：臺灣石賓。

【沒水仔】mud sui` e`：沒入水中閉氣。

【狗牯琢】gieu` gu` dog：蝦虎。

【無唉無哉】mo` ai` mo` zai`：渾然不覺、不為所動。

【齊口】ce` heu`：高山鯛魚。

【挽仔】van` e`：釣鉤。

【山鱧仔】san` lien` e`：臺灣馬口魚。

【摔】ca`：拉起、提起。

【洋公】iong` gung`：七星鱧。

【白哥仔】pag go` e`：溪哥。

【黃阿角】vong` a` gog`：三角鮎。

【紅哥白】fung` go` pag：粗首蠟。

【沙溜羌】sa` liu` giong`：沙鰕。